



Momentan na datti betg pli ina «question jurassienne», mabain ina «question de Moutier», l'única vischnanca bernaisa che vegniss en dumonda per in «nov» chantun dal Giura.

In 2017 insolit en il Giura

Nua van Moutier e sia vallada?

DA GUIU SOBIELA-CAANITZ

■ **Il congress da Vienna (1815) ha restitui a l'Austria ses anteriur possess da Milaun e Com, engrondi t. a. cun la Vuclina, Buorm e Clavenna. Quai è stà ina greva perdita per il Grischun. Per la paja ha il congress schlargià ils cunfins svizzers encunter Frantscha e Savoia, cun t. a. annexiuns bernaisas tranter l'Alsazia ed il Lai da Bienna.**

Dalonder conflicts che han pli tard pertutgà l'entira Svizra federala. La crisa dal «Kulturkampf» ha laschà fastiz da Laufen enfin a Porrentruy, era suenter la restauraziun da l'investgieu da Basilea 1884. Davent da 1947 è sa sviluppà in moviment popular per la creaziun d'in chantun Giura en la part francofona dal chantun Berna. Lez ha arranschà davent da 1974 ina seria da votaziuns territorias per eruir ils giavischs da las populaзиuns en ils districts pertutgads. Il 1979 è naschì il chantun Giura ord l'anteriura part catolica e romanda da Berna, cun la chapitala Delémont e la citad da Porrentruy. La vallada alemana da Laufen è ida 1994 a far part da Basilea-Champagna. Il giuven chantun Giura è sa verifitgà aifer la famiglia confederada. Pli ras vischnancas francofonas restadas bernaisas, cunzunt la pitschna «ville» da Moutier, han lur elegi suprastanzas separaticas. Il 1994 han il cussegl federal ed ils dus chantuns pertutgads stgaffi ina «Assemblée interjurassienne» (AIJ) per il

dialog tranter il chantun Giura ed il Giura bernais. Il 24 da november 2013 ha mintga vischnanca dals dus territoris vuschà per u cunter il project d'in chantun nov che cumpigliass ils districts romands da domadus. L'entir chantun Giura ha vuschà «per», ma l'entir Giura bernais «na», danor Moutier (55% «gea»); il vitg da Belprahon sper Moutier ha dà il medem dumber da «gea» e da «na». Momentan na datti betg pli ina «question jurassienne», mabain ina «question de Moutier», l'única vischnanca bernaisa che vegniss en dumonda per in «nov» chantun dal Giura.

Votaziuns democraticas

Moutier (7608 olmas), sper il flum Birse, è ussa la vischnanca principala dal Giura bernais. Ella è limitrofa da pliras vischnancas pli pitschnas, t.a. Châtillon e Haute-Sorne en il chantun Giura. Moutier è situada a mo nov minutas da tren da Delémont, sin la lingia che collia Basilea cun Geneva e Losanna. Delémont (12 186 olmas) e ses chantun fan part dal spazi economic basilais, pli avert e dinamic che quel da Berna. En il chantun Giura fiss Moutier la segunda citad, pli impurtanta che Porrentruy (6780 olmas). Dapi decennis sa meglierescha la convivenza tranter catolics e reformads. Tut quai stimulescha il giavisch da s'unir cun il chantun Giura (71 738 olmas), il qual promova sia collavuraziun cun l'agglomeraziun basilaisa. Moutier vuscha

pia ils 16, 17 e 18 da zercladur 2017 davart sia appartegnientscha chantunala. Sin giavisch dals dus chantuns pertutgads vegn l'Uffizi federal da giusticia a delegar observaturs per survegliar l'andament da la votaziun. Sche la citad tscherina il Giura vegnan quatter vischnancas da sia vallada, numnadamain Belprahon, Crémines, Grandval e Sorvilier (respectivamain 314, 539, 362 e 255 olmas), ad analisar il resultat da Moutier e decider da lur atgna appartegnientscha. Perder Moutier na muntass bler per il chantun Berna, il segund, suenter Turitg, per la cifra da populaziun cun sias 1 017 200 olmas. Gudagnar Moutier dess al pitschen chantun Giura (839 km²) ina segunda citad e la cuntantezza da recuperar in center istoric da l'anteriur principadi episcopal basilais, patria da l'istoricher Paul-Otto Bessire (1880–1958). Per la Svizra munta la votaziun da zercladur 2017 l'ocasiun per ina vischnanca, forsa schizunt per pliras, da tscherner democraticamain lur appartegnientscha chantunala. Lura, pli che mai, sto l'AIJ promover vinavant il dialog tranter il chantun, engrondi u na, e las valladas restadas bernaisas, perquai che la votaziun da Moutier na vegn betg a schliar la «question jurassienne». Sche lezza citad pitschna tscherina il chantun Giura duai il suveran svizzer probablamain ratifitgar quella midada; quai dess lura l'ocasiun opportuna da discutir ils fundaments da noss federalissem.